

ARRÜNA SEGUNDO ÑACONOMOSORRTI SAN JUAN

¹Arrüñü mayor nü auna eana bama icocoromati Jesús. Icüputa arrüna nirraconomoso tanu aemo Ciria, arrücü niquiasi au nürirrti Jesús, y tarucu nacua iñemo. Süro tanu nirraquionco aemo y ümo ito bama naübosi, bama cuasürüma ito iñemo. Aucuasürüca ümo namanaiña bama isuputacaimia arrüna ñemanauncurratoe manunecatarrü. ²Itopiqui arrüna ñemanauntu manunecatarrü ane au nuyausasü ahüburu. Chüpuerrüpiü aenso oñopünanaqui. ³Urria nusaca uiti Tuparrü, naqui Uyaiü, y uitito Jesucristo, naqui Aütorrti. Icusüñancanama oñü, y pucürusuma utacu, sane nauqui atusi oemo arrüna ñemanauntu manunecatarrü, y nauquito ucuasürü oemoampatoe.

Arrüna ñemanauntu manunecatarrü y nucua oemoantoe

⁴Ipuçünunca nurria, itopiqui ipiate, eana bama aübosi aboma bama iñatama nisüboriquirrimia isiuqui arrüna ñemanauncurratoe manunecatarrü. Ta sane yacüpuçurrti Bae Tuparrü oemo. ⁵Sane nauquiche rranquira apünanaquicü niquiasi, tari namanaiña oñü ocuasürüra oemoantoe. Arrüna sane nisura champürrtü nuevurrü nirraccüpuçu aume. Ta anancatai arrüna bacüpuçurrtü oemo auqui maiübo. ⁶Arrtü ñemanauncurratoe cuasürüti quiatarrü oemo, macoconauca ümo arrüba yacüpuçurrti Tuparrü. Tone arrüna bacüpuçurrtü oemo, arrüna oñoncoi auqui maiübo. Tiene que uisamune nanaiña aübu nucua oemoantoe, y aübu nicuarrti Tuparrü oemo.

⁷Itopiqui chauqui tütaboma süñumanama bama mañatachemaca. Süromati au nanaiñantai icu na cürrü. Arrüma namatü que chüñemanauntupü cuati Jesús auna icu na cürrü tücañe aübu ñemanauncurratoe cürrü nicütüpürtti. Ui arrüna sane manunecatarrü uisuputacama bama mañencañaca, bama churriampü ümoma arrüna urria ümoti Cristo. ⁸Amasasai nurria, tapü

apiñensonocota arrüna ñemanauntu manunecatarrü, arrüna tiyebo aboi. Tapü ensoro amopünanaqui naucua uiti Tuparrü au napese. ⁹Artri naqui iñocotati ñanunecacartri Cristo, y manunecanati quiatarrü manunecatarrü, champüti Tuparrü ichepeti. Tapü artri naqui manunecanati isiuqui ñanunecacartri Cristo, anati Cristo ichepeti, y arrtito Bae Tuparrü. ¹⁰Así que arrtü cuati taman aübu quiatarrü manunecatarrü, tapü apasuquiucati au naupo. Tapü aucrirrtianuca aübuti. ¹¹Itopiqui arrtü aucrirrtianuca aübuti, ane napipüinate ichepeti, itopiqui artri ane nomünantü uiti.

¹²Aninqui chama surapoboibo ausucarü, pero chirrancapü iconomo aume, itopiqui irranca yero tanu yapasearaño, nauqui puerurrü ito rrapari abaübu, upucünuncubu.

¹³Ñaquioncorrüma tanu aemo namanaiña bama aübosí naruqui, arrüna tacümanauncunu ito uiti Tuparrü.